

Analîza Strana Ez Xelef im li ser Şopa Dîroka Kurdan ya Sedsala XIXem The Analysis Of Ez Xelef im Song In The Footsteps Of Ninetenth Century Of Kurdish History

Nurdan ŞARMAN**

PUXTE:

Ji ber ku di dîroka Kurdan de zargotina Kurdî, nemaze muzîka Kurdî, çavkanîyeke girîng e, xebatêni di vî warî de dikarin di gelek xalêni dîrokî de bibin rênîşaner. Li ser vê xetê strana *Ez Xelef im* a bi nav û deng -herçiqas derheqê jêderâ stranê de em ne xwediyê agahdariyên dorpêc û eseh bin jî- dikare di gelek waran de sedsala XIXem ronî bike û derfeta lêpirsînên taybet bide destê me. Nirxandina vê stranê dê di nav şert û mercen sedsala XIXem de nerînên me fireh, asoyêni me geş bike û çend versiyonên vê stranê dê deriyê xwendinên cuda li ber me veke. Lewre ev stran xwediyê rîtim û naveroke-ke wisan e ku dikare atmosfera sedsala 19mîn a Kurdistanê ya şeran, ya geşandinên politîk ku di dîroka Kurdan de bûne sedemên geşandinên girîng bide ber çavan. Ku bi nîrînek din mirov vê stranê bide ber xwe ev yek hem dê derfet bide ku mirov li geşandinên Kurdistanê yên ku din nav dîroka nivîskî

Ez ji Abdulhekîm Kartal û Mirza Baran re spas dikim ku di sererastkirina nivîsa Kurdî de ji min re bûn alîkar.

**** Wanebêj, Zanîngeha Şîrnexê,
Dibistana Bilind a Tûrîzm û
Kargeriya Otelkariyê, Şîrnex,
Turkiye.**

Lecturer, University of Sirnak, School
of Tourism & Hotel Management,
Sirnak, Turkey.

e-mail: nurdanurek@gmail.com

Bêjeyêni sereke: “Ez Xelef im”, sedsala XIXem, serhildan, berxwedana Êzdînşêr, Şêx Ubeydullah.

ABSTRACT:

Kurdish oral culture especially Kurdish traditional music has a great of importance as being a source of Kurdish history. In this sense, *Ez Xelef im* song as being one of the popular representative of Kurdish folk song is a oral source to clear and examine the nineteenth century of Kurdish history although there isn't any certain information about its meaning. To handle this song with developments of nineteenth century of Kurdish history will provide both having a new historical outlook about that said times and having various evaluations about the meaning of song. *Ez Xelef im* song which has a epic meaning in Kurdish verbal memory is a reflection of that moving period of nineteenth century Kurdish history. Because this song almost has a rhythm and content that reflect the wars, political and politics development in Kurdistan during nineteenth century. From another angle this song also has a lot of hints which provide thinking about developments never handled by written history of Kurdistan and provide evaluating some events and persons which registered to written history by a non-objective way with a new perspective.

Keywords: "Ez Xelef im", nineteenth century, uprising, resistance Êzdînşêr, Shaykh Ubeydullah.

1. DESTPEK

Bi sedem ku Kurd li ser dînamîkên xwe di merheleyê neteweyê din re derbas nebûbûn, piştî şerê cîhanê yê yekem zêdetir mehkûmî rewşike parçebûyî bûn. Dema înkarkirina nasname, pişaftin, zilm û koçberiyê jî bêñ hesibandin, "folklo-ra Kurdi" an jî "çanda devkî" bi taybetî jî muzîka Kurdi, di parastina nasnameya Kurdan a neteweyî de, bû xwedîyê roleke sereke. Şêweya jiyana Kurdi, guherînê civakî û zaravayê cuda tev jî şewqa xwe dane vê çanda dewlemend û cure bi cure, nifş bi nifş hatine neqilkirin. Bi saya zargotinê ev yek nifş bi nifş gîhiştiye heta roja me; em ji vê çanda dewlemend û qedîm bêpar nemane. Tiştên qewimîne gelek ji wan bi riya muzîkê di hafizeya hevpar de cih girtine. Bi vê yekê em dikarin bibêjin muzîka Kurdi bi tena serê xwe kevneşopî, mîrateya bav û kalan, talan û bûyerên dîrokê tomar kirine; ragihandine ber destê me (Çelebi û yên din, 2006). Strana *Ez Xelef im* jî li ser van asasan nimûneyeke xurt û populer a zargotina Kurdi ye. Kê ci wextî, bi ci awayî, bi ci sedemê ev stran gotiye em nizanin. Li ser vê yekê şîroveyê cuda hene, lêbelê dîsa jî mirov bi hêsanî dikare bibêje ku ev stran gelek şopêx xurt ji sedsala XIXem di nav xwe de dihewîne. Sedem vê yekê beriya şîrovekirin û analîza vê stranê hewce ye nerînê rûniştî yên derbarê sedsala XIXem bêñ veçirandin. Ev demajo di heman demê de, di warê hin kêmasî û şaşiyê di berhemê nivîskî yên

derbarê dîroka Kurdan a sedsala XIXem de û di warê nêrînên cuda li bûyer, qewimîn û şexsiyetê serdemê de lêpirsînekê jî bi xwe re tîne. Ev yek girîngiya strana *Ez Xelef im* bi awayekî dîrokî zêdetir dike.

Di navbera sedsala XVIIIem û XIXem de li dinyayê gelek bûyerên ku rasterast an bi navgînî, bandorêن xurt li çarenûsa gelê Kurd kirine qewimîne (Lazarev û Mihoyan, 2013: 105). Strana *Ez Xelef im* wek berhemeke dîroka devkî bi me dide xuyakirin ku di seranserê sedsala XIXem de atmosfera Kurdistanê dibe warê serhildan û berxwedanan¹.

- 1 Li hemberî van kesan ku dibêjin piraniya tevgerên Kurd ên sedsala XIXem netewî û serxwebûnxwaz bûn, hinek angaştên din jî hene. Li gorî van angaştan serhildanêن Kurd ên sedsala 19emîn ji hişmendiyek xwerû netewî bêpar bûn û ya rastî tevgerên vê pêvajoyê xwedan daxwazên otonomiyê bûn. Ji ber ku di vê xebatê de armance se-reke ew bû ku derbarê dîroka stranê û wateya wê de çend angaştan pêşniyaz bikim, ez bixwe qet neketim nav nîqaşen kûr ên derheqê netewîbûn an ne-netewîbûna tevgerên Kurd ên sedsala 19emîn. Lîbelê tezên ku min ev stran bi tevgerên wê serdemê re dan ber têkiliyê, bi saya hin angaştan hatin qewînkirin ku wan angaştan jî tevgerên Kurd ên sedsala 19emîn wek tevgerên netewî qebûl dikirin. Wadie Jwaideh di xebata xwe ya “Dîroka Neteweperweriya Kurdi” de destnîşan dike ku serhildanên Kurd ên curbecur ên di sedsala 19emîn û di destpêka sedsala 20emîn de dest pê kirin, ne bûyerên munferît bûn ku bi tenê jî ber têkçûneke aborî an jî bêmemnûniyeteke siyasi çêbûn (Jwaideh, 2014). Hassanpour dibêje, “Şeran û parçekirina Kurdistanê li ser gesedana netewî ya Kurdan du bandorêن sereke, lê dijber derxistin holê. Wan ji hêlekê ve rê li ber Kurdistanê yekbûyî digirtin. Ji hêleke din ve jî rê didan ku ligel herifandin û zilman wek encama serdestiya biyaniyan, hişmendiyek netewî ava bibe di nav civatekê feodal de ku endamên wê li hemberî malbat, eşîr û warê bav û kalan dilsoz bûn. Xuya ye, netewe û neteweperwerî ku di sedsala 17emîn de li wan deverên dinyayê anakronîzm bûn, di nav şert û mercên taybet ên li Kurdistanê de geş bûn. Hestên neteweperweriyê ku bi eslê xwe ji bendên eşîr û herêmî cuda bûn hem ji hêla takekesan û hem jî ji girseyên civatê hatin derbirîn. Bêguman gelek serhildanên mîrîn Kurd ên li dij serdestiya biyaniyan xwedan armanceke tenê bûn: Parastina desthilatiya xwe ya xweserî ku ji bav û kalan ve ji wan re maye. Qasî ku em ji kêm çavkaniyan dizanin, “Kesên ku rêberiya van serhildanên li dijî serdestiya biyanî kirine mîr û beg bûn ku ji dêvla tevahiya Kurdistanê an jî hin beşên wê hema tenê axa xwe diparastin.” (Hassanpour, 2005: 127,128, 129). Hassanpour, ji ber ku di navbera neteweperweriya çîna navîn ya serdema me û neteweperweriya wê demê de tevlîheviyek çênebe vêya wek neteweperweriyekê feodal bi nav kiriye. Veguhastina neteweperweriya Kurdi bo neteweperweriya çîna navîn di îdeolojiya netewî ya Hacı Qadîri Koyî (1817-1897) de xuya dibe. Koyî li ber rêberên arîstokrat ên kevneşopî û çîna ruhbanê radibû û bo avakirina dewleta Kurd bangî xelkê dikir û ji bo wê armancê jî propagandaya karanîna wêjê û zimanê Kurdi jî dikir (Hassanpour, 2005: 131). Pêvajoya ku cara duyem bi parçekirina Kurdistanê dest pê kir (1918) -Kurdistan di nav pênc dewletan de tê dabeskirin û desthilatiya dewletê di her deverê herêmê de belav dibe- rê li ber yekitiya etnik a gelê Kurd girt (Hassanpour, 2005: 135).

Em ê di vê xebatê de strana *Ez Xelef im* li ser pênc xalên cuda rave bikin. Şiroveyên li ser naveroka stranê hemî subjektîv in û hinek ji wan li ser şopa îhtimalan dimeşin. Jixwe armanca min ew e ku ev strana ku hinekî atmosfera sedsala 19mîn dide der, li ser nêrînên şexsiyetên girîng ên wê demê hin qenaetên berdest biguherîne. Di şirove û nirxandina stranê de me hem ji kelepora nivîskî, hem jî ji ya devkî û rîwayetên nav gel sûd girtiye (bi gelempêri riwayetên li herêma Botan)². Beriya ku em derbasî dahûrandina stranê bibin divê bi gelempêri em li ser şert û mercen sedsala XIX'em bisekinin.

2. DI SEDSALA XIX'EM DE REWŞA KURDISTANÊ YA GELEMPERÎ

Kurdistana ku cara yekem bi Şerê Çaldiranê (1514) ketibû bin deshilatdariya dewleta Osmanî, bi peymana Qesrê Şîrînê (1639) ku sînorênen dewleta Osmanî û Îranê diyar dikir, hema bêje bi tevahî daxilî erdê Osmanî bû. Kurdistan wek berê –digel peymana navborî jî- salêni pey jî di navbera Osmanî û Îranê de ji ber şerê tixûban bû qada şer. Herçiqas tixûbênen fermî yêni di navbera van dewletên mezîn ên navborî de li cem Kurdishaniyan ne xwedî hikmekî resen bû jî, her du dewletan jî baca uşirê bi darê zorê ji Kurdishaniyan hildigirt, bi kotekî Kurdistanî ji xwe re dikirin leşker. Bi ser vê yekê jî, Kurdishaniyan heya sedsala XIXem karîbûn bi awayekî xweser bijîn.

Rojhilata Nêzik û ya Navîn ji dawiya sedsala XVIIIem heta serê sedsala XI-Xem pê ve dibû qada şerînen dewletên mêtînger. Dewleten mêtînger wek Rûsyâ, Almanya, Brîtanya, Frensa û piştre Awistirya di navbera xwe de plana parvekirina dewleta Osmanî dikirin ku roj bi roj lawaz dibû, hilwedişa. Ji aliyekî din, têkoşînên rizgariyê yêni neteweyî -ji bilî neteweya tirkân- yêni gelên din ji bo van berjewendiyêni xwe bi kar dianîn, her diçû tehekuma xwe xurt dikirin (Lazarev û Mihoyan, 2013: 107). Rûsyâ di sedsala 19an de çar caran li hemberî dewleta Osmanî, du caran li hemberî dewleta Îranê şer kiribû û di destpêka van şeran de Kurd li dijî Rûsyayê derketibûn, piştre bi piranî xwe dabûn pişt Rûsyayê.³

-
- 2 Ji ber dîroka nivîskî ya Kurdan hatiye manîpulekirin û sedem vê yekê ku Kurd şexsiyetên xwe yêni dîrokî û dîroka xwe di çarçoveyeke “emîk” de dinirxînin ev riwayet girîng in.
- 3 “Didema seferên artêşa Rûsan ên bi ser Tirkiyeya rojhilat û Îrana rojava de, fermandarêni Rûsyayê bi Kurdan re têkiliyeke wisa danîne ku Kurd tenê bibin hevalbendê wan an jî qet nebe bêalî bimînin. Nikare bê gotin ku Rûsyayê piştgirî dida Kurdishaneke serbixe, lê digel her tiştî, wekî encama siyaseta Rûsyayê ya li ser rojhilata-nêz a di sedsala 19mîn û destpêka sedsala 20mîn de, hilwesîna leşkerî û siyasi ya Osmanî û Îranê leztir kiriye, ev bûye alîkarî ji bo çêbûn û hêzdarbûna tevgera rizgarî û netewî ya Kurd” (Lazarev ve Mihoyan, 2013: 107).

Di vê serdemê de ji bo Kurdan xaleke girîng jî ew e ku di salêن 40 û 60î ên sedsala XIXem de şah û paşayên hikûmeta Îran û Osmanî dezgehêن idarî û politîk yên kevn li ser şopa dewletêن ewrûpî guhaztine, yeknavendî xurt kirine, bi reformêن jako-ben tevgeriyane heyâ ev yek di nav Kurdan de bûye sedema gengeşî û nexweşîyan (Lazarev û Mihoyan, 2013: 136).

Wek encam ji sedsala XIXem pê ve dewleta Osmanî û Îran ku hem bi hev re hem jî bi Rûsyayê rê di nav şer de bûn, li aliyekî jî dixwestin û hewl didan ku mîrektiyêن Kurdan yê ber bi rizgariyê ve diçûn kontrol bikin. Di vê qada şerê giran de li ser axa Kurdistanê ji çaryeka pêşîn ya sedsala XIXem heyâ ya dawî, Kurdêن ku hem dixwestin rizgar bibin, hem jî dixwestin ji bandorêن neyînî yên van reformêن dawî xilas bibin û ji ber vê mebestê jî li ser hev gelek caran serî rakirine, ji teref dewleta Osmanî bi awayekî hovane hatine tepisandin. Ev serhildan roj bi roj ber bi tevger û fikreke neteweyî ve diçû, her yek ji ya pêşîn berfirehtir, mezintir dibû (Lazarev û Mihoyan, 2013; Kutschera, 2013; Hassanpour, 2005).

3. STRANA EZ XELEF IM Û ANALÎZA WÊ

Mirov dikare strana *Ez Xelef im*, ku yek ji stranên Kurdi yên navdar e, wek straneke epîk û anonîm binirxîne. Strana *Ez Xelef im* ku hema bêje li hemû herêmên Kurdistanê hem ji aliyê Kurdêن sunnî hem ji aliyê yên din tê zanîn -wek minak Êzidî, hwd.- xwedîyê govendeke taybet e ku li gorî herêman versiyonêن vê govendê jî hene. Herçiqas cara yekem kê gotiye, sedema gotina vê stranê ci ye, em xwedî agahdariyêن teqez nebin jî ev stran ji paletiyê bigire heyâ cejn û rojêن taybet bi aweyekî coş hatiye gotin.

Strana *Ez Xelef im* ku bi iñtimal ji helbesteke dûrûdirêj hatiye girtin, gelek rêzikên wê ne berdest in û çend hevok û rêzikên wê jî di stranê de nayêñ xwendin. Lewma em hay ji halê wê yê resen nînîn.⁴ Di rêzik û fonetîka stranê de li ser şîroveyêñ dengbêj û stranbêjan li gorî herêman hin cudatiyêñ piçûk hene. Li jêr çend versiyonêñ stranê hatine rêzkirin.

4 Gorî riwayetêñ mirovekî ji Botan ku ji pîr û kalê xwe bihîstiye, ev stran di rastiya xwe de 25 çarîn bûye, piştre 17 çarîn ji teref hin kesan hatiye nivîsîn, çar pênc çarînêñ stranê jî, ji teref dengbêj û stranbêjan hatine bestekirin. Derbasbûna helbestê li bal stranê ve di navbera salêن 1840 û 1847an de ye. (Ev riwayet ji navnîşana vê malperê û ji belgefîlma *Ez Xelef im* hatiye girtin. <http://www.cizremeda.com/cizira-botan-ez-xelefim-xelefim--120v.htm> (Cizîra Botan - *Ez Xelef im Xelef im*)).

EZ XELEF IM(1)

Ez xelef im
 Hawar e Mîr hawar e Mîr
 Hawar e lo!
 Ez xelef im xelef im
 Êzdînşêr begê Botan e
 Xweyê şûrê sedef im
 Hawar e Mîr hawar e Mîr
 Hawar e lo!
 Xweyê şûrê sedef im
 Êzdînşêr begê Botan e
 Gel eşîra bixwendeme
 Hawar e Mîr hawar e Mîr
 Hawar e lo!
 Gel eşîra bixwendeme
 Êzdînşêr begê Botan e
 Ez xelefê bi şîvî me
 Hawar e Mîr hawar e Mîr
 Hawar e lo!
 Ez xelefê bi şîvî me
 Êzdînşêr begê Botan e
 Xweyê şûrê bi zîvî me
 Hawar e Mîr hawar e Mîr
 Hawar e lo!
 Xweyê şûrê bi zîvî me
 Êzdînşêr begê Botan e
 Gel eşîra bi hêvî me
 Hawar e Mîr hawar e Mîr
 Hawar e lo!
 Gel eşîra bi hêvî me
 Êzdînşêr begê Botan e
 Herbolê xweş Herbolê
 Hawar e Mîr hawar e Mîr

Hawar e lo!

Herbolê xweş Herbolê
 Êzdînşêr begê Botan e.
 Bi gumguma daholê
 Hawar e Mîr hawar e Mîr
 Hawar e lo!
 Bi gumguma daholê
 Êzdînşêr begê Botan e.
 Xweş şer e li qeleqolê
 Hawar e Mîr hawar e Mîr
 Hawar e lo!
 Xweş şer e li qeleqolê
 Êzdînşêr begê Botan e.
 Hewrexê xweş Hewrexê
 Hawar e Mîr hawar e Mîr
 Hawar e lo!
 Hewrexê xweş Hewrexê
 Êzdînşêr begê Botan e.
 Bumba bavên Gemrexê
 Hawar e Mîr hawar e Mîr
 Hawar e lo!
 Bumba bavên Gemrexê
 Êzdînşêr begê Botan e.
 Meş em herin ser Şernexê
 Hawar e Mîr hawar e Mîr
 Hawar e lo! (Bafi, 2005: 170-172)

EZ XELEF IM(2)

Ez xelef im, xelef im
 Hewar e mîro hewar e,
 Ez xelef im xelef im
 Ezdînşêr mîrê Botan e
 Xwedîyê şûrê bî sedef im

Hewar e mîro hewar e
 Xwedîyê şûrê sedef im
 Ezdînşer mîrê Botan e
 Li nav eşiran bi gef im
 Hewar e mîro hewar e
 Li nav eşiran bi gef im
 Ezdînşer mîrê Botan e
 Ez xelefê kinik im
 Hewar e mîro hewar e
 Ez xelefê kinik im
 Ezdînşer mîrê Botan e
 Xwedyê şûrê bi şîrik im
 Hewar e mîro hewar e
 Xwedyê şûrê bi şîrik im
 Ezdînşer mîrê Botan e
 Li nav eşiran bi rik im
 Hewar e mîro hewar e
 Li nav eşiran bi rik im
 Ezdînşer mîrê Botan e
 Ez xelefê şûvî me
 Hewar e mîro hewar e
 Ez xelefê şûvî me
 Ezdînşer mîrê Botan e
 Xwedîyê şûrê Misrî me
 Hewar e mîro hewar e
 Li nav eşiran bengî me
 Ezdînşer bege Botan e
 (Cigerxwîn, 1988: 22-23).

Êzdînşer mîrê Botan e
 Xwedîyê şûrê bisedef im
 Hawar e mîr hawar e mîr
 Xwedîyê şûrê bisedef im
 Êzdînşer mîrê Botan e
 Nav eşiran bigef im
 Hawar e mîr, hawar e mîr
 Nav eşiran bigef im
 Êzdînşer mîrê Botan e
 Ez xelef im xelef im
 Hawar e mîr, hawar e mîr
 Ez xelef im xelef im
 Êzdînşer mîrê Botan e
 Ez xelefê kinik im
 Hawar e mîr, hawar e mîr
 Ez xelefê kinik im
 Êzdînşer mîrê Botan e
 Xwedîyê şûrê bişirik im
 Hawar e mîr, hawar e mîr
 Xwedîyê şûrê bişirik im
 Êzdînşer mîrê Botan e
 Nav eşiran birik im
 Hawar e mîr, hawar e mîr
 Nav eşiran birik im
 Êzdînşer mîrê Botan e
 Ez xelef im xelef im
 Hawar e mîr, hawar e mîr
 Ez xelef im xelef im
 Êzdînşer mîrê Botan e⁵

EZ XELEF IM(3)

Ez xelef im xelef im
 Hawar e mîr, hawar e mîr
 Ez xelef im xelef im

5 Versiyona herî belavbûyî ya vê stranê ev e.

Ev beşa xebata me, ji vir pê de li ser riya çend pirsan, analîz û armanca gotina vê stranê dihewîne. Ev serpirsên ku dikevin pey îhtimalên nirxandinên cuda li jêr in.

Gelo Kilama Ez Xelef im meydanxwestina Xelefê Şûvî ye ji Êzdînşêr (Yezdanşêr)?

Baweriyeke mezin heye ku di vê kilamê de Xelefê (Xelefê Şûvî) axa, serok an ji rêberê eşireke bi navê Şûvî, ji Mîr Êzdînşêr meydan xwestiye û mîr gazî şer kiriye. Yek ji wan kesên ev kilam gotine Şivan Perwer e û ew di destpêka kilamê de behsa çirokeke ku hêz bide vê baweriyyê dike. Di destpêka kilamê de Perwer “Çiroka me di derbareyê Xelefê Şûvî û Êzdînşêrê mîrê Botan de ev e.” dibêje û bi devê Xelefê Şûvî wiha diqire: “Wa Êzdînşêr! Mîrê Botan! Ka kê piştä xwe spartî Romiyan e? Tu dibêjî Xelef ditirse ji meydan e. Ka were em iro dekê xwe li hev bidin. Emê bibinîn kî berx e, kî beran e!” Piştî vê, Perwer dibêje ev şerê ku di navbera pêşengerekî Botan Xelefê Şûvî û Mîrê Botan Êzdînşêr de dibe, şerê birakuijîye ye; dema Kurd bi Kurd re şer bike Osmanî/Tirk ji vê rewşê qezenc dikin û dûre dest bi gotina kilamê dike.

Eger em li ser rewşa cezakirina kesên li hember deshilatdariya Êzdînşêr derdi-kevin bifikirin, îhtimala meydanxwestina serokê eşirekê yê bi navê Xelefê Şûvî li hember Mîr Êzdînşêr geleki zêde ye. Di kilamê de hebûna kesekî ku her dem behsa nav û hêza xwe dike û çavê yê hemberî xwe ditirsîne vê îhtimalê zêdetir dike. Lê di kilamê de îhtimaleke din heye ku Xelefê Şûvî li hember Mîr Êzdînşêr meydanê dixwaze. Sedemên vê îhtimalê ji ev in: Heke Xelefê Şûvî li hember Êzdînşêr meydanê dixwaze û gazî şer dike, çima dibêje “Êzdînşêr mîrê Botan e.” Çima bi pesindarî dibêje “Êzdînşêr mîrê Botanê ye”? Heke Xelefê şûvî biqîriya an ji xîtabî Êzdînşêr bikira, diviya ku hevok bi qertafa tewangê (-ê) biqedîya.⁶ Yanê diviya ku hevok weki “Êzdînşêr mîrê Botanê” bûya. Di vê rewşê de yan bi demê re “ê” bûye “e”, yan ji Xelefê Şûvî meydanê naxwaze û berevajî leqeba wî wekî pesindayînekê tîne zimên. Aliyekî din, Xelef çima wî kesî gazî şer dike û meydanê dixwaze; di heman demê de ji dibêje “mîr hawar e” û jê alîkarî dixwaze? Di kilaman de bêyi li wateya wan bêñ nêrîn hin peyv û banêşan îhtimal heye tenê ji bo qafiyeyê hatibin bikaranîn û îhtimal heye bi demê re guherîna dengan ji pêk hatibe. Mînak dibe ku “mîr hawar e” di rastiya xwe de “mîr ha were” be û bi demê re guherîbe. Yan ji dibe ku rastî “min hawar e” be û bi demê re bûbe “mîr hawar e”. Em werin li ser gotinên Şivan Perwer ên derbarê kilamê de. Em dikarin bibêjin Şivan Perwer bi gotinên xwe yên di serê kilamê de dixwaze balê bikişe li ser şerên biratiyê yên bûne sedemek ji bo têkçûna serhildanêñ gelê Kurd û serekêñ Kurdan ên sedsala 19mîn.

6 Hema bibêje hemû versiyonên devkî û nivîskî yên vê kilamê de ev rês pênaseya rewşa cihê Êzdînşêr dike. Yanê dawî bi “e”ya lêkera alîkar diqedede ne ku bi “ê” ya qertafa tewangê.

Li vir em kevanekê vekin û bibêjin: Ji Xelef re Şûvî tê gotin, wekî serekê eşirekê be. Di çarçoveya vê xebatê de, li herêma Botan ne di rîwayetên nivîskî de ne jî di agahiyên wan kesên derbarê vê kilamê de axivîne, behsa Xelef û eşireke bi navê Şûvî nayê kirin. Di vê rewşê de du ihtimal çedibin: Heke em Xelef wekî kesekî qebûl bikin, wê demê dibe ku Şûvî leqeba wî be, ne ku navê eşirê be; yan jî Xelef ne navê kesekî ye.

Di hin gotegot û şiroveyên derbarê kilamê de dibêjin ku Xelef ji ber îxaneta li Mîr Bedirxan kiriye ji Êzdînşêrî aciz dibe, jê meydan dixwaze û gazî şer dike. Êzdînşêr bi Osmaniyan re peymanê girê dide û di encama vê de ku dibe sedema dilketina rîbereki wekî Mîr Bedirxan bi hêz; wekî rewşike jirêzê serekên aligirên Mîr Bedirxan li dij desthilatiya Êzdînşêr derketine. Ev ihtimal were hişê mirov jî, ji ber ku Xelef di kilamê de tenê behsa hêza xwe kiriye û behsa Mîr Bedirxan nekiriye, ihtimaleke lawaz e. Îhtimala ku rêzên behsa Mîr Bedirxan dikin negihîştibin ber destê me hebe jî, şiroveya ku Xelefê Şûvî ji ber îxaneta li hember Mîr Bedirxan ji Êzdînşêr hêrs bûbe û ew gazî şer kiribe zêde maqûl naxuye.

Cigerxwîn jî di berhema xwe ya bi navê *Folklorâ Kurdî* de dibêje Xelef navê kesekî ye. Lîbelê Cigerxwîn wekî meydan xwestina Xelef li hember Êzdînşêr şirove nake. Cigerxwîn derbarê kilamê de wiha dibêje: “*Di vir de, Xelef, navê xwe û şûrê xwe û mîrê xwe û hinek jî ji pesnê xwe dane xuyakirin. Çawa, ko navê eşira xwe ji jî me re daye xuyakirin. Ji lewra, ev (Xelef) ji eşira Şûva ye, ko di bin destê mîrê Botan de ye. Çawa, ko em zanîn, ko navê mîrê Botan jî, di ve çaxê de Êzdînşêr bû yan jî Şerezdîn. Herweku dide zanîn, ko di wê çaxê de, kalanê şûrênen xwe sedef dikirin û şûrênen Misri, Kolmisri gihiştibûn Kurdistanê. Ev dîlok di ber dîlanê re tê gotin û bi giranî vê dîlokê dibejin û davêjin berhev û li hev vedigerînin û govend milê rastê diçe*” (Cigerxwin, 1988: 23). Di çarçoveya vê şiroveya Cigerxwîn de, dema Xelef behsa xwe û hêza xwe dike, pê re behsa mîr jî dike û dibêje: “Êzdînşêr Mîrê Botan e.” Belkî bi niyeta fîkrîn ku ew xwe hevberê mîr dibîne, hetanî xwe ji wî bihêztir dibîne, pêşî lê bigire dibêje. Belkî jî mirov dikare bibêje di şertên wê demê de navê mîran û kirinên wan di neqeratên stran û kilaman de wekî bikaranîneke giştî bûye.

Dema mirov van nirxandinan tevan bide ber çavê xwe, mirov dikare bibêje ku baweriyên derbarê wateya vê kilamê de mutleq ne rast in. Yanê mirov dikare bibêje ihtimal hene ev kilam ne derbarê şerxwestina Xelefê Şûvî be û Xelef jî ne navê kesekî be. Bi vê sebebê di bin sernivîsên pirsên li jêr, wateyên di vê kilamê de tênehlîlkirin.

Di piraniya van sernivîsên pirsî de, bi awayekî ji bo Êzdînşêr têkiliyên bihêz tênehlîlkirin. Di serî de divê em kevanekê vekin. Sebebê van çavkaniyan û sebebê

kêmbûna têkiliya kilamê bi lehengiya Ezdînşêr ve, kêmasiyên wê û rola kilamê ya di vegotina kesekî wekî Êzdînşêr ê dîrokî de çi ye, em behs bikin.

Sebebê bingehîn a şîrovekirina her wekî kilam behsa qehremaniya Êzdînşêr dike belkî ji ew e ku Êzdînşêr bi Osmaniyan re peyman girê daye û li hember kesekî wekî Mîr Bedirxan ku di dîroka Kurdan de gelek girîng e, derketiye. Yanê ev kilam di nava Kurdan de wekî merşâ serkeftin û qehremaniyê tê gotin, divê ihtimala pesindayîna kesekî wekî Êzdînşêr ku rola ixanetê jê re tê dîtin, zêde bi mantiqî lê neyê nêrîn.

Neteweyekî wekî Kurdan ku dîroka wan bi destên kesan -bêyî objektîviyê- hatiye nivîsin, dema ku dîroka xwe dinirxînin car caran van agahiyên tewş û çavkaniyên nerast ji xwe re çavkanî digirin û dikevine şaşiyê. Kurd (an jî kesen li ser navê wan diaxivin û dinivîsin) dema kesekî dîrokî an bûyerekê bi nêrîneke nûjen dinirxînin û pirsyar dîkin dikevine şaşiyeye civakî û encameke wisa derdikeye ku hin ji dîroka Kurdan û hin kesen dîrokî rast neyên famkirin. Va ye qurbanekî vê şaşiya dîrokî û civakî kesekî di dîroka Kurdi de jî Êzdînşêr e. Rola neyînî ya dîrokî (xayîn) ku li Êzdînşêr hatiye barkirin, bûye sebeb ku ew kesê girîng neyê dîtin û neyê nasîn. Di pirtûkên behsa sedsala 19mîn dîkin an jî ev serdem jî tê de diborin de navê Êzdînşêr yan bi kurtî dibore yan jî qet nabore. Di çavkaniyên ji bo Kurdan hatine nivîsin de jî kesekî nezan, sexiyekî çavşor, rîberekî sexik, hetanî ku rastî jî kesekî xayînê doza Kurdîtiyê ye. Di pirtûkên dijî Kurdan hatine nivîsin de, arşîvên Osmanî û İngilizî de jî, begekî jirêzê ye yan jî digel ku rehetiya wî û gelê wî di cî de bûye, ew rehet nesekiniye û bûye rîbirekî belayê serê Osmaniyan.

Di dîroka devkî an jî hafizeya herêmê de gelek caran, (bi taybetî gelên ku dîroka wan a nivîskî tune an jî ya heyî jî bi awayekî derewîn hatiye nivîsin) çavkaniyên gelekbihêz têne dîtin. Dîroka nivîskî gelek caran girîngiyê nadî van çavkaniyan û davêje aliyekî. Lîbelê li gorî Pierre Norayê “*Hafize her dem wekî qewimîneke rojane me bi dema bêdawî ve girê dide; dîrok jî tenê nûnertiya paşerojê ye. Dîroka ku bi xwe şîroveyeke rewşenbîrî, sekuler û pevxistî ye, wekî dij hafizeyê, gotareke rexneyî ye. Dîrok her dem ji hafizeyê şikê dike û ji ber vê jî peywira rastî ya dîrokê dewisan-din û tunekirina hafizeyê ye.*” (Nora, 1989: 8-9). Bi hemû berhemên objektîv ên li ser Êzdînşêr hene -ku ne zêde ne jî- û şopêñ derbarê wî yên di folklora Kurdi de jî mirov bigire destê xwe, girîngiya Êzdînşêr a di dîroka Kurdi de rastir dikare derîne holê. Ev dê bibe sebeb ji bo lêvegerandina rûmeta Êzdînşêr. Mimkin e di hafizeya devkî de mirov bi işaretên qehremanî, wêrekî û rêzdariya Êzdînşêr re têkildar gelek efsaneyan bibîne. Beşek ji van efsaneyan di şîroveyên derbarê wateya kilama *Ez Xelef im* de diborin. Beşek ji efsaneyen derbarê cih û wateya kilama *Ez Xelef im* a di bîra Kurdan de (yanê baweriya ku ev kilam derbarê qehremanî û şerkeriya Êzdînşêr

de ye) didin nîşan ku cih û wateya wê di hafizeya Kurdan de gelek girîng e. Hinek efsaneyên di vê mijarê de wiha ne:

“Biraziyê Bedirxan Êzdîn hebûye. Êzdîn kesekî pir jêhatî û şervanekî baş bûye. Mezinên me digotin Êzdîn fermandarê artêşa Bedirxan bûye. Dema Êzdîn diçû şer, digot: ‘Ez Êzdîn im, ez şêrê mîrê Botan im.’ Elî çawa şêrê Xwedê ye Êzdîn jî şêrê mîr bûye.” “Şerekî sultanê Osmaniyan hebûye û kesekî nekaribûye li hember wî destê xwe bavêje simbêlê xwe. Rojekê Êzdîn rasî vî şêrî tê, destekî xwe avêtiye simbêlê xwe û destekî jî daniye ser şûrê xwe û awirekî tûj avêtiye şerî. Şêrî ji tırsan bi xwe de rîtiye. Ji ber vê wêrekiya wî jê re şer hatiye gotin; yanê bûye Êzdînşer.” “Sultanê Osmaniyan du malbatêñ xanedanî (yek malbata Silêman Beg, a din jî malbata Evdal Beg) ji Botanê sirgûnî Zoqeydê (niha gundekî Misircâ Sêrtê ye) kiriye. Li Zoqeydê paşayekî zalim ê Osmaniyan bi navê Fettah Paşa hebûye. Fettah Paşa rojekê erîşî Evdal Beg kiriye. Evdal Beg xeber ji Êzdînşer re şandiye û jê alikarî xwestiye. Êzdînşer hatiye alikariyê, Fettah Paşa kuştîye û ji kelhê avêtiye jêr. Paşê jî ji bo bide nîşan ku ji Osmaniyan natirse, gotiye ez ê li vir tiştekî biçînim û heta şîn bibe bi derekê ve naçim. Mirov şînbûna tiştekî çandî bide ber çavê xwe, tê famkirin ku Êzdînşer xwestiye bide nîşan ku ji Osmaniyyêner werine tolhildana Fettah Paşa, natirse. Ev jî delîla wê ye ku ew çiqas rîberekî bêtirs û wêrek bûye.”

Rîwayeteke derbarê Êzdînşer a di pirtûka Dîroka Kelepora Mîrnişîniya Botan⁷ de jî dîsa nîşaneya wê ye ku Êzdînşer di hafizeya herêmî ya Kurdî de xwediyê nasnameya şervanî û wêrekiyê ye û di heman demê de kesekî adil e. Ev rîwayet jî bi kurtî wiha ye:

Dema Êzdînşer heft salî bûye bavê wî Sêvdîn wefat dike. Piştî vê, mamê wî Bedirxan xwedîkirina Êzdînşer digire ser xwe. Êzdîn di nava zarên gund de her dem kesekî rîber bûye. Zarok tev di bin emrê wî de ne û lîstikan piranî Êzdînşer bi rê ve dibe. Dîsa rojekê zarokên gund di bin rîbertiya Êzdînşer de bi hespêñ xwe yên darîn lîstika şer lîstibûne. Mîr Bedirxan di wê navberê de bi pêşengêñ Botan re di civînekê de bûye. Êzdînşer ji artêşa xwe ya ji zarokan re gotiye “istîqamet civîn e” û li pêş Êzdînşer li paş zarok bi hespêñ xwe yên darîn daketine odaya civînê. Kesên di civînê de li hember vê bûyerê heyirî dimînin û dikenin û paşê Mîr Bedirxan ji Êzdînşer dipirse: “Ka bibêje tu û artêşa te hûn ci dixwazin?” Êzdînşer gotiye “Mîrê min ez fermandarê vê artêşê me û leşkerên min birçî ne. Ez ji wan re xwarinê dixwazim.” Bi fermana Mîr Bedirxan ji zarokan re xwarin hatiye anîn û wan jî zikê xwe

7 Ev pirtûk ji aliyê Mele Xelefê Bafî ve hatiye berhevkirin û eslê wê ji rîwayetên destxetî yên Erebî pêk tê. Di sala 2005an de pirtuk ji aliyê Dîlawer Zengî ve ji bi tîpêñ latînî ji nû ve hatiye çapkirin (Bafî, 2005).

têr kirine. Piştî vê, Êzdînşêr ji mamê xwe Mîr Bedirxan re gotiye leşkerên Mîrektiya Botan li hember dijmin kêm in û ji vir paş de ez ê artêşa xwe bigihînim, lê ji bo vê jî ihtiyyaca min bi pereyan heye. Li ser vê Mîr Bedirxan gotiye tu dikarî baca eşirekê ji bo ihtiyyaca artêşa xwe bicivînî. Êzdînşêr artêşa xwe hildaye çûye mala axayê vê eşîrê. Lêbelê axa feqîr bûye û gotiye ji bilî dîkekî nikare tu tiştî bide wî. Êzdînşêr ev dîk qebûl kiriye û di rê de bi leşkerên xwe yên zarok dîkî dide rûçikandin. Dema Êzdînşêr digihîje ba Mîr Bedirxan, mîr jê pirs kiriye ka baca xwe standiye yan na. Dema Êzdînşêr dibêje min nestand, Mîr Bedirxan sebebê vê pirs kiriye. Êzdînşêr dîkê di destê xwe de dirêjî Mîr dike û dibêje "Mîrê min ha ji te re, tu dikarî tiştekî ji vî dîkî bistinî? Axayê wê eşîrê jî mîna vî dîkî ye." Li ser vê Mîr Bedirxan kenyiaye û soz daye êdî tu car ji wê eşîrê bacê nestîne (Bafi, 2005: 148-153)

Ev efsane işaretên girîng in û didine nîşan ku Êzdînşêr di hafizeya Kurdên herêmê de ji xayînekî zêdetir qehremanek e. Kesekî wekî Berdixan ku li ser axa di bin hikmê wî de dewlemendiyek aborî û civakeke di nav xweşiyê de ava kiriye, li Kurdistanê jî mîrîtiyeke serbixwe saz kiriye. Êzdînşêr li hemberî Bedirxan bi Osmanî re tifaq kiriye û bûyê sedema têkçûna Bedirxan. Ev yek jî bûyê sebebê qedandina xweşî û dewlemendiya Botan.

Pêşıya ku em vê tevgera Êzdînşêr bi îxanetî bi nav bikin, divê mercên civakî, çandî û siyasi yên wê serdemê li ber çavan bêñ girtin. Çavkaniyêñ devkî û nivîskî hene ku dibêjin bavê Êzdînşêr Mîr Sêvdîn jî di dema xwe de mîrekî serbixwe bûye. Tê gotin Mîr Bedirxan jî bi Osmaniyan re bûye yek û ev rîberê girîng (Mîr Sêvdînê Bavê Êzdînşêr) ji text xistiye. Lêbelê ne Bedirxan, ne jî Êzdînşêr xwestiye ku Kurdistan bi temamî bikeve bin destê Osmaniyan. Di sedsala 19mîn de peymanê beg û rîberên Kurdan bi Osmanî û dewletên mêtinkar re piranî stratejîk bûne. Bedirxan Beg ji bo bikeve cihê wî bi Osmaniyan re bûye yek û Mîr Sêvdîn ji text xistiye, lê paşê ji bo bi temamî bibe serbixwe bi Osmaniyan re têkoşîn kiriye. Êzdînşêr jî ji bo Bedirxan ji text bixe û bikeve cihê wî bi Osmaniyan re bûye yek, lê ew jî li hemberî Osmaniyan serhildanekê (ji ya Bedirxan bihêzir û berfirehtir) dide destpêkirin û dikeve nava liv û tevgerê ji bo Botan bibe mîrekîyeke serbixwe. Dîsa Şêx Ubeydulahê Nehrî jî bersiva gaziya cîhadê ya Osmaniyan dide û xwe alîgirê wan dide nîşan û piştre bi fikra Kurdistanêke serbixwe serhildaneke mezin daye destpêkirin. Em dikarin şerên mîran wekî şerê textî bibînin û di mercên begîtiya wê demê de em dikarin bibêjin bûyereke jirêzê ye. Zêdetir di wan deman de eşîrên Kurdan di mijara ka dê kî bibe mîr de bûbûne komên cuda. Çawa eşîrên ku dixwestin mîrîti ji Mîr Bedirxan re bimîne hebûn, wisa eşîrên ku digotin divê mîrîti bimîne ji yekî ji mala Mîr Sêvdîn (yanê Êzdînşêr) re jî hebûn. Tê zanîn piştî ku Bedirxan Beg bû mîr jî ev kom bi hev

re di rewşa şer de bûn. Di aliye kî din de ku mirov tifaqa Bedirxan Beg bi Osmaniyan re li ser jitextxistina Mîr Sêvdîn li ber çavan bigire, Êzdînşêr fikiriye ku mîrîti heqê bavê wî û piştre jî heqê wî bûye û Bedirxan ev heq xesb kiriye. Bi vê sebebê mirov dikare bifikire ku Êzdînşêr di mercên wê demê de li hemberî Bedirxan Beg (paşê navbera wan xweş bibe jî) bi hêrs bûye.

Wekî encam di mercên begîtiya wê demê de, mirov dikare navandina bi xayîntiyê ya jî bo pevçûnên di navbera endamên xanedanê de wekî şâsiyeke civakî binirxîne. Loma mîrîn ku bi tifaqa Osmaniyan re hatine ser text, divê mirov li ber çavê xwe bigire ku wan ji bo têkoşîna rizgariya herêma xwe û tevahiya Kurdistanê xebatê mezin kirine. Ev têkoşînên serweriyê di wê demê de hem ji aliye malbata xanedanê ve hem jî ji aliye Kurdan ve têkoşîneke edetî tê dîtin ku di hafizeya Kurdî ya herêmî de ne Bedirxan, ne jî Êzdînşêr wekî xayîn nayêñ binavkirin. Ev kes bi şexsiyetê xwe yên pêş û serkeftî her tim hatine vegotin.

Di hin çavkaniyê ku behsa Êzdînşêr dîkin de, ev ifade diborin: “*Yezdanşêr di sehneya siyasi ya wê demê de qehremanekî bi nakok lê di heman demê de tipik e. Yezdanşêr li aliye kî li ser erdeke kifş berjewendiyêñ serweriya xwe ya şexsî li pêş girtiye û rîberekî feodalê rastîn bûye. Bêrêbazî û nakokiya wî ya siyasi û minêkariya wî ya ku bi desthilatiyan re li hev hatiye, ji vê diqewime. Li aliye din, ew rexistinkarekî jîhatî û welatparêzekî Kurdistanê bû. Ji bo rizgarkirina axa xwe ketiye nav tevgera serhildanê. Serhildan bi ser tixûbê Botan ketiye û li seranserê Kurdistana di bin destê Osmaniyan de belav bûye. Tevger di rengê feodalîya cudakî de bû lê xwe gihandiye keviya tevgereke neteweyî.*” (Lazarev û Mihoyan, 2013: 138).

“*Kurdan hurmeteke mezin ji Yezdanşêrî re digirt û heta ku digotin nesla Yezdanşêrî ji ya sultanêñ Tirk kevnartir û bi rûmetir e.*” (Averyanov, 2010: 101).

Êzdînşêr jî di çavê piraniya eşîrîn Kurd de mîna Bedirxan ji malbata Ezîzan û ji nesla Xalid bîn Welîd (Xalidê kurê Welîd) wekî kesekî pîroz e, bi qasî Bedirxan Beg muteber e û mîrîti jî dema dora wî hat mafê wî yên rewa ye.⁸ Li aliye kî din valahiya desthilatiyê ku piştî Bedirxan Beg çê bûye, tijekirina wê ji aliye Êzdînşêr ve, di çavê Kurdêñ bê serek de pêwistîyeke mezin bû. Loma Kurd li hember sefer û tevgerên Osmaniyan ên bi navê tedîbê û li hember rîveberên nû yên Osmaniyan ku dihatin tayînkirin di bin zextêñ gelek mezin de bûn. Herweha Êzdînşêr di dema serfermandariya Bedirxan Begê de bi şexsiyeta xwe ya şerker û wêrek navdar bûye û ji bo textê valabûyi jî tam lêhatî ye. Alîkariya zarêñ Bedirxan Begê ji bo serhildana Êzdînşêr ji,

8 Li gora Şerefnameyê Begêñ Cizîrê ji malbata Ezîzan in ku nesla wan digihêje Xalid bin Welîd (Şerefhan, 1990: 1135).

tîne hişê mirov ku di wê demê de nexweşiya di navbera malbatê Êzdînşêr û Bedirxan Begê de xelas bûye, an jî kêm bûye. Êzdînşêr bi serhildana ku da destpêkirin û gerand, hurmeteke mezin hem di herêma xwe de hem jî di nava Kurdan de qezenc kiriye. Bi ser de jî, (çawa di pêş de dê bê vegotin) serhildana ku ew bi rê ve dibe ji serhildana di dema Bedirxan Begê de jî berfirehtir e.

Gelo ev kilam straneke wekî merşan bû ku lesker û yekîneyên Mîrektiya Botan di şer, berxwedan û serhildanan de gotine?

Me berê jî gotibû sedsala 19mîn di dîroka Kurdan de ji aliyê serhildan, berxwedan û şeran ve serdemeke pir bi hereket e. Di Kurdistanê de di vê serdema ku her serhildan ji ya pêşiya xwe berfirehtir bûye û her serhildan bi xwînê hatiye dewisandin, zêdetir hewcedarî bi motîvasyon û wêrekiyê çê bûye. Folklor taybetiyê dema derketina xwe an jî serdema ku behs dike di xwe de digire. Mirov ku bibêje atmosfera kilama *Ez Xelef im*, atmosfera dîroka Kurdan a sedsala 19mîn e, nabe dêrew. Loma ev kilam şewqa ruhê şer, serhildan, berxwedan, serkeftin û qehremaniyê dide, mînanî ku cesaret û motîvasyonê bide servan û gelê Kurd. Di dîroka Kurdan de serhildana pêşin û mezin a sedsala 19mîn di serdema Mîr Bedirxan de dest pê kiriye. Kilama *Ez Xelef im* iştimal heye ku ji ber sebebê li jor di serhildana serdema Mîr Bedirxan de hatibe gotin û di serhildanê pişt wê jî zêdetir belav bûbe û berdewam kiribe. Çîrokê destekê bidine vê fîkrê û wê erê bikin li devera Botan hene. Ev çîrok wiha ne:

“Leşkerên artêşa Bedirxan Beg dema diçûne şer ji bo motîve bibin û piştî şer jî ji bo pîrozkirina serkeftinê, ev kilam digotin.” “Bi qasî me ji kalanbihîsiye gotina vê kilamê ji aliyê dengbêjan ve, rastî salên 1840 û 1847an tê.”⁹ “Dema serkeftineke leşkerî pêk bihata ev kilam bi coş dihat gotin. İro jî rojê şahiyê yên wekî dawetan de û dema serkeftinek çêbibe dîsa bi coş tê gotin.”

Rîwayeteke herêma Botan ku işaretî hebûna vê kilamê di serdema Bedirxan Beg de dike wiha ye: “Di dema Bedirxan Beg de, demekê di navbera Goyî û Ertoşîyan¹⁰ de şerek derdikeve. Ewêna navbera wan û Bedirxan Beg xweş e, xeberekê dişinin û jê alîkariyê dixwazin. Bedirxan Beg leşkerên xwe ji bo alîkariya Goyiyan dişîne û mezînê eşîra Ertoşîyan tê kuştin û Goyî bi ser dikevin. Piştî vê bûyerê Ertoşî sond dixwin ku heta roja heyfa xwe hildin govenda Ez Xelef im berevajiyê eşîrên din bilîzin.”

9 Serdema ku di bin rîbertiya Bedirxan Beg de serhildana mezin a Kurdî çêbûye.

10 Goyî an jî Goyan eşîreke ku navenda wan li Qilabana Şîrnexî ye. Ertoşî an jî Hertoşî jî konfederasyoneke eşîran e ku ji 12 eşîran pêk tê û belavî Bêtûşebab, Hekarî, Wan û Kurdistana başûr bûne. Di vê serdemê de Ertoşîyan ku bi Goyiyan re di nava şer de bûn, di nava mîrektiya Hekariyê de di bin desthilatiya Mîr Nûrûlîah de bûn.

Govendeke xasî vê kilamê li gelek deverên Kurdistanê heye û awayê vê govendê ya li Botan û derdora wê dişibe hereketên şerî. Govend wiha tê lîstin: Du gav diçin pêş û du gav jî paş ve têن û gavekê jî dîsa diçine pêş û wiha didome. Ev hereket bi awayê “çûna yek pêş û yek paş” wekî fermaneke leşkerî sembolize dibe. Dîsa li gora rîwayetên devera Botan “Peyva xelef a di vê kilamê de ne navê kesekî ye, xelef pêşengê şer e, rêvebirê şer e û kesê sergovend be dibe xelef.¹¹” Li vir peyva xelef (paşhatî) dijwateya selefê (pêşhatî) û wekî rêvebirê şer were bikaranîn ne xerîb e. Loma di wê demê de rêvebir û pêşengên şeran piranî ji malbatêن xanedanî ne û fermandar in (wekî Bedirxan Beg, Êzdînşer û kurêن Bedirxan). Guhertoyeke vê kilamê ku li devera Botan bi awayê “Ez xelefê Begê Botan im” tê gotin, vê fikrê piştrast dike.

Ku wisa ye, çîma di kilamê de navê Êzdînşer bi derbdar dibore û kilam bi navê wî navdar bûye? Pêşıya ku em bersivê bidin divê em kevanekê vekin û behsa girîngiya Êzdînşer û serhildana sedsala 19mîn a di bin fermandariya wî de pêk hatiye bikin.

Êzdînşer kurê Mîr Sêvdînê (Seyfedîn) mîrê berî Bedirxan Beg e.¹² Ji xeynî vê, serfermandarê artêşa Bedirxan Beg e. Êzdînşerê ku difikire Bedirxan Beg mîritî ji bavê wî Sêvdîn xesb kiriye, pêşıya ku mîreşalê artêşa Anadolê ya Osmaniyan Osman Paşa bimeşe ser Cizîrê (Nisan 1847) sefa xwe diguhere û ji Cizîrê direve û tevî Osmaniyâ dibe. Ji ber endamekî malbata Ezîzan û kurê Mîr Sêvdîn e, ji vê rûmetê hêz digire û di têkçûna Bedirxan Begê de roleke girîng digire. Piştî Bedirxan Beg di destpêka tebaxa 1847an de teslîm dibe, ji kîrhatina wî ya di têkçûna Bedirxan de û ji ber endamekî xanedanê ye, ji aliyê mîreşalê artêşa Anadolê ya Osmaniyan Osman Paşa ve, wekî muteselimê (wekîltiya mîrêmîran) Cizîr, Botan û Hacîbehramê tê tayînkirin. Lîbelê Sultan Evdilmecîd û hikûmeta Osmaniyan, ji bandora wî ya di nav Kurdan de û rêveberiya serbixwe ya bavê wî (Mîr Sêvdîn) ditirsin û kesekî ji malbata Bedirxan Begê wekî rêveberê Cizîrê rast nabînin. Di sala 1848an de bi avakirina eyaleta Kurdistanê re Cizîr jî dibe senceq û dema Mustefa Paşayê ku fermandarê artêşa Bedirxanî têk dibe wekî qaymeqam tê tayînkirin, Êzdînşer dimîne di valahiyê de (Kardam, 2013: 140-141). Ji ber ku pismamê Bedirxan Begî ye tê hizirkirin ku dê bandora xwe di herêmê de zêde bike, loma jî di Adara 1849an de wî dişînin Stenbolê. Paşê jî ji ber Cizîr musaîd nayê dîtin, wî li Müsilê wekî efser peywirdar dikin. Di vê pêvajoyê de paşayên Osmaniyan bo her derên Kurdistanê ku di bin

¹¹ Ev govend berê li devera Cizîrê piranî li ber defê dihat lîstin. Stran piranî bi awayê vegerînê yanê bi dubareya hemberî tê gotin.

¹² Dî hin çîrokan de tê gotin ku Mîr Sêvdîn birayê Bedirxan Beg e (Bafi, 2005: 138).

serweriya Osmaniyan de ne, tên şandin. Hin bajarên kifše yên Kurdistanê ji aliyê leşkergehê Osmanî ve tên dagirkirin (Kardam, 2011: 379-380; Ögün, 2010: 66-67, 77-78; Averyanov, 2010: 131).

Bi têkçûna Bedirxan re bidestxistina Kurdistanê temam bûye û pergala mîrîtiyê hatiye rakirin. Lê bi avakirina eyaleta Kurdistanê û pêkanîna Tenzîmatê, valahiya ku ji tesfiyeya began pêk hatiye nayê tijekirin; di cihê mîrektiyênu ku saziyên gelek kevnar û xwediyê kevneşopiyê dîrokî ne, saziyên nû nayê danîn û di vê rewşê de jî teqez xelasiya ji xerabûnên aborî û civakî, bêasayışî û talanê mumkin nebû. Berteka Osmaniyan a li hember vê rewşê zêdekirina zextan û cezakirina eşîrên bê kontrol bû (Kardam, 2011:384). Zêdebûna bacan, leşkeriya mecbûrî, bi taybetî bertîlxwarî û nelirîtiyê rêveberên herêmî dibûn sebebê nerazîbûneke mezin. Konsolosê Îngilistanê yê Mûsilê Rassam di rapora xwe ya ji balyozê li Stenbolê Stratford re şandî de wiha dibêje: “*Rewşa zilmkariyê gihîştiye asteke wisa ku Kurdan dest pê kirine li rîberekî digerin da ku ji nîrê zilma ew xistine bin barekî giran, xelas bibin.*” (Public Record Office [Pro Fo], 195/394, C.A. Rassam to Stratford de Redcliffe, Moossul, 3: 190-192: 1855: Veg: Ögün, 2010: 107). Yezdanşêr wekî endamekî xanedana Cizîra Botan, malbata Ezîzan û kurê Mîr Sêvdîn ji bo lêgerana rîberekî tam lêhatî bû (Kardam, 2013: 143).

Yezdanşêr biraziyê Bedirxan, di serhildana Botan a di sala 1847an de alî Tirkan kiriye, lêbelê duv re di di sedsala 19mîn de serkişıya serhildaneke herî mezin kiriye. Serhildan bi ser tixûbê Botan ketiye û li seranserê Kurdistana di bin destê Osmaniyan de belav bûye. Tevger di rengê feodaliya cudakî de bû lê xwe gihandiye keviya tevgereke neteweyî.

Şerê Qirimê yê wê demê dest pê kiriye, rî li ber Êzdînşêr û serhildana wî vedike ku bi pêş ve biçe. Di sala 1853yan de dema Osmaniyan bi Rûsan re şer ilan kir, Kurdan guh nedan celba gazîkirina leşkeriyê.¹³ Di salên 1853-57an de di navbera Kurdan û Rûsan de têkiliyê dostane pêk tên (Averyanov, 2010: 102-132).

Ji ber ku Yezdanşêr kurê Mîr Sêvdîn bû rêveberiya Cizîra Botan heqê xwe didît û pêşî ji aliyê Bedirxan ve û paşê ji aliyê Osmaniyan ve ev heqê wî hat xesbkirin û ew hat mexdûrkirin.¹⁴ Yezdanşêr li ser vê rewşê çar salên li Mûsilê bi xeyala vî

13 Ewê bersiva vê gaziyê didin jî eşîrên li ser sînorê şerê Rûs û Osmaniyan in ku di bin zextên yekîneyên Osmaniyan de bûn (Averyanov, 2010: 131). Pişti ku Rûs bi ser dikevin Kurdan xwe ji şer vekişiyane (Averyanov, 2010: 132).

14 Êzdînşêr, dema di serhildana Bedirxan de alîkariya Osmaniyan dikir, hêvî dikir ku dê Osmanî wî wekî waliyê Kurdistanê tayîn bikin. Lêbelê ji ber Osmaniyan nedixwest rîberê navdar ê Kurd bihêztir bibe, destekdayîna wî red kir (Lazarev û Mihoyan, 2013: 139).

heqê xwe yê ji destê wî hatî standin diborîne û ji mehêne dawiya sala 1853yan ve li herêma Botanê digere û amadekariya serhildanê dike. Li ser têkçûna Osmaniyan li hember hêzên Rûsan a di havîna 1854an de, vê ji bo bikaranîna planêne xwe wek fersendekê dibîne û radibe piyan. Yezdanşêr bi hêzeke 400 kesên ji Mûsilê civandine, hefteya duyem a Cotmeha 1854an ji bo biçe Cizîrê ji Mûsilê vediqete. Serhildan di Kanûna Pêşî ya sala 1854an de tam di navika Kurdistanê de, li başûr û rojhilate Tirkiyeyê Anadola başûr-rojhilat (eyaletên Botan û Hekarîyê) dest pê dike. Êzdînşêr bi vî awayî di 15 rojan de dibe xwediyyê axa edetî ya Mîrektiya Cizîra Botan. Qada serhildanê di sala 1855an de herêma bakurê Kurdistanâna başûr û Kurdistanâna başûr-rojhilat digire û ber bi başûr-rohilatê ve belav dibe. Pêşî Kurdên Hekariyê, dûre Kurdên Miksê û eşîrên Botan tevî Yezdanşêr dabin; di demeke kin de Êzidî jî di nav de eşîrên din ên Kurd tevî wî dabin. Ji bo serhildanê bifetisînin, paşayê Bexdayê Kenan leşkergehê Bexda û bajarê din li Sêrtê dicivîne û dimeşe ser Êzdînşêr, lê di navîna meha kanûnê de nêzî Sêrtê têk diçe û direve. Li ser vê serhildan belavê Bexdayê heta Wanê dibe. Di meha sibatê de êdî 60 hezar kes di artêşa Êzdînşêr de hene, hin çavkanî dibêjin 100 hezar e.¹⁵ Romên li herêmê û 2 hezar jî ji Erebistanê tevî sefên Êzdînşêr dabin. Serhildan di dawiya zivistana 1855an û destpêka biharê de digihîje asta herî jor. Di navbera leşkerê Êzdînşêr û Osmaniyan de li nêzî Keleha Pagvansê ya başûrê Gola Wanê şerek derdikeve. Di vî şerî de 4 hezar miriyên Osmaniyan çêdibin û bi paş vedikişin (Averyanov, 2010: 132-133; Lazarev û Mihoyan, 2013: 139; Kardam, 2013: 142-144; Kardam, 2011: 379-380).

Serhildana ber emrê Êzdînşêr û zêdebehûna hejmara alîgirên wî, waliyê Kurdistanê û rêveberên herêmî bi awayekî cidî xistine nava fikaran; tırsiyane ku Êzdînşêrê serhildér bibe “Bedirxanekî nû”. Waliyê Kurdistanê tırsiyaye ku Bedirxan Beg û Xan Mehmûd ên sirgûnkirî ji Gîritê birevin û bêne Kurdistanê. Loma di rewşeka wiha de serhildan dê ji herêma Botan derkeve û heta Miksê bikare belav bibe (Kardam, 2013: 145-146). “Hikûmeta Osmanî (Bab-ı Alî) qebûl kiriye ku serkeftina Êzdînşêr ji bo wan ji destçûna Qers û Erziromê xetertir e (Notên derbarî Kurdên Botan yên Îvanovê Musteşar ku konsolosê kevn ê Erziromê bû û herî dawî bû Konsolosê Helebê, 1877-78, Veg: Averyanov, 2010: 342). Beşêke mezin a artêşa Osmanî ji bo terbiyekirina serhildana Kurdistanâna mezin a Êzdînşêr di şerê 1854-55an de dema şerê Rûs û Osmaniyan de ji qada şerê eniya Qersê hatiye vekişan (Averyanov, 2010: 104). Bab-ı Alî di naveka 1855an de ji bo serhildana Êzdînşêr bifetisîne operasyonê dide destpêkirin. 22yê Sibata 1855an de yekîneyên osmaniyan û hêzên Êzdînşêr li Dirûna (îro Duruköy) navbera Mêrdîn û Cizîrê rastî hev têne. Yezdanşêr bi giranî

¹⁵ Ne Osmaniyan ne jî Îranê tu demê ji Kurdên bin emrê xwe de ev qas leşker necivandine.

têk diçe, pêşî vedikişe Cizîrê, pê re diçe Qesra Gelî ya li bihurka Qesrikê ku li ser riya Cizîr û Dêrgulê ye (Kardam, 2013: 147). Yezdanşêr dema li Qesra Gelî bûye ji nû ve amadekariyên serhildanê dike û dixebite ku bi artêşa Rûsan re bikeve têkiliyê, lê nikare bi ser bikeve. Osmanî di vê navberê de serhildêran paşve davêjin. Di dawiya meha nîsanê de Yezdanşêr bi soza namûsê ya konsolosê Îngilîstanê li Mûsilê û paşayê Osmaniyan ji Qesra Gelî derdikeve û bi nûnerên Osmaniyan re biryara hevdîtinê dide. Lê di dema hevdîtinê de yekcar tê girtin û dibin Stenbolê û tê zîndankirin. Li ser vê, tevgera Kurdî bê serek dimîne, paş dikeve û di demeke kin de jî xelas dibe (Lazarev û Mihoyan, 2013: 140; Averyanov, 2010: 134; Celil, 1992: 166). Yezdanşêr paşî sirgûnê Vîdînê tê kirin. Di Kanûna Paşî ya 1858an de direve û dîsa hewl dide ku serhildanekê rôexistin bike lê tê girtin û dîsa tînin Vîdînê. Her çiqas paşî bê efûkirin jî, careke din îzna wî ya vegera Kurdistanê nayê dan (Kardam, 2011: 379-380).

Derbarê girîngiya serhildana Êzdînşêr de ev têن gotin: “*Tiştê ku serhildana Yezdanşêr ji yên pêşîya wî cudatir dike, himêzkirina axa fireh a Kurdistana bakur û rojavayê ye.*” (Lazarev ve Mihoyan, 2013: 140). Waliyê Kurdistanê Mehmed Hemdî Paşa di rapora xwe ya 26ê Kanûna Pêşî ya 1854an de ji Derseadetê re şandî de, “*Heke rôbir gihîstibûna armancêن xwe, dê ev neguncanî bi vê deverê tenê nemaya û li aliyekî Sêwas û li aliyê din heta Bexdayê belav bûya û dê bûbûya sebebê mesrefên mezin. Di vê rewşê de tevger dê ji serhildana Bedirxan bûbûya pirsgirêkeke mestir û bi vekirî were dîtin ku her ku biçûya dê derketa çend qatêن xwe. Ji dema efsûnkarî (piştî Bedirxan Beg ji holê hat rakirin) li vê herêmê nehatîye dîtin û nehatîye bihîstin ku Kurd wiha bi hev re bûne tîfaq û evqas pevçûnên mezin kirine.*” dibêje û kifş dike ku di piş perdeya vê bûyerê de Yezdanşêr heye (Öğün, 2010, 88-89).

Li vir emê kevanekê bigirin û dîsa vegerin ser mijara bi ci sebebê kilam li ser navê Êzdînşêr hatîye gotin û navdar bûye. Êzdînşêr di serdemâ Bedirxan de serfermandarê artêşê bûye, bi şerkerî û wêrekiya xwe navdar bûye; dibe ku di vê kilamê de behsa nav û dengê xwe, hêza xwe kiribe û cesaret dabe artêşa xwe. Dibe ku kilam ji aliyê wî bi xwe ve hatibe nivîsîn an jî li ser hatibe nivîsîn û dibe ku gorî mercêن wê serdemê ji nû ve bi navê wî hatibe şirovekirin. Li aliyekî din, ji ber ku mîrê herî dawî¹⁶ Êzdînşêr e û eger mirov mezinahîya serhildana di bin emrê wî de, encamên wê û navdarbûna Êzdînşêr li ber çavan bigire îhtimala ku kilam berê hebe û dûre pirtir bi navê wî hatibe xwendin, bêtir derdikeve pêş.

16 Piştî ku Êzdînşêr di sala 1855an de ji holê hat rakirin, dawî li desthilatiya mîran a li herêmê anîn. Lîbelê ji bo demek pir kin Osman Begê kurê Bedirxan mîrîtiya xwe ilan kir. Ji ber ku mîrîtiya Osman Beg pir kin bûye, mirov dikare bibêje Êzdînşêr mîrê dawî ye.

Pirseke din jî ku bê hişê mirov dibe ku wiha be: Eger kilamê di dema serfermandariya Êzdînşer de dest pê nekiribe, yanê ji pêşî de hebe, yan jî bi sefermandariya wî re dest pê kiribe, çima ji Êzdînşer re “mîr” tê gotin. Bersivên vê pirsê yên bi iñtimalê wiha ne: İhtimala hebûna kilamê di pêşıya ku Êzdînşer bibe mîr (di dema serfermandariya wî an jî pêşî de) ji bo îlankirina mîrîtiya wî, iñtimal heye ji nû ve hatibe şirovekirin. Loma hin işaretên iñtimala guherinê hene ku kilama dema serfermandariya wî bi mîrîtiya wî re guheriye¹⁷. Yek ji van jî hin versiyonê vê kilamê li herêma Botan “Êzdîn şêrê mîrê Botan e/Botanê” tê gotin.¹⁸ Çawa tê dîtin li vir behsa Êzdînşer ne wekî mîr, wekî şêrê mîr tê kîrin. Ev çîroka li herêma Botan jî vê iñtimalê piştrast dike: “Biraziyê Bedirxan Êzdîn hebû. Şervanekî pir jêhatî bû. Mezinan digotin ku Êzdînşer serfermandarê Bedirxan bûye. Dema Êzdînşer diçû şer, ‘Êzdîn şêrê mîrê Botan e’ digot. Hz Eli çawa şêrê Xwedê ye, ew jî şêrê mîr bûye.” Di vê rewşê de piştî Êzdînşer dibe mîr, ristika ‘Êzdîn şêrê mîrê Boten e’ tê gotin ku iñtimal heye bûbe ‘Êzdînşer mîrê Boten e/Botanê.¹⁹

¹⁷ Li gorî rîwayeteke devera Botan: “Dema Êzdînşer bû mîr, ji bo vê pîroz û ilan bike ev kilam gotiye û şahiyêni 40 roj û 40 şevan bidome li dar xistiye.” Di vê rewşê de, ristika Ez Xelef im (Divê xelef bi wateya dijwateya selefê be. Yanê divê wateya wê “ez xelef im”, “ez paşhatî me” be) a di kilamê de, ristika “Êzdînşer mîrê Botan e” ku tê wateya îlankirina mîrîtiyê û ristika “Xweyê şûrê sedef im, nav eşîran bengî me” ku hêz, nav û nîşana mîrê nû hatiye ser text nîşan dide, vê rîwayetê piştrast dikin. Ji bili vê ristika “Bi gumguma daholê” ya ku di wersiyona pirtûka Dîroka Kelepora Mîrnîşîniya Botan (Bafi, 2005) de dibore, işaretê şahiyekê dike. Dibe bê gotin ku ristika “Mîr hawar e” ya ku di kilamê de dibore jî, tê wateya “mîr ilan dike, mîr gazî dike.”

Baş e, gelo ev kilam/helbest bi mîrbûna Êzdînşer re hat gotin, an di pêşıya wî de jî li Kurdistanê ji bo mîrbûnê dihat gotin? İhtimal heye ku ev kilam ji bo hemû mîrên li Kurdistanê ji bo îlankirina mîrîtiyê yan jî cara pêşî ji bo îlankirina mîrîtiya Êzdînşer hatiye gotin. Heke em iñtimala ku kilam ji bo îlankirina mîrîtiya hemû mîrên Kurdistanê bûye qebûl bikin jî iñtimala ku kilam bi navê Êzdînşer bûye -ji ber ku mîrê dawî bû û di nava Kurdan de bi nav û deng bû- divê bê ravekirin û li ber çavan bê giritin.

¹⁸ An jî ev ristik di rastiya xwe “Êzdîn, Şêrê Mîrtiya Botan e” ye û dibe ku deng jê guherîbin.

¹⁹ Navê wî yê rastî Êzdîn e û li gorî rîwayetê ji ber ku şervanekî baş û wêrek bûye, “şêr” wekî leqeblî navê wî hatiye zêdekirin. Rîwayeta sebeba dayîna vê leqebebê li devera Botan wiha ye: “Şerekî sultanê Osmaniyan hebûye, tu kesî nedikarî simbêlê xwe li ber vî şêrî badaya. Êzdînşer destekî xwe daniye ser simbêlê xwe, destek jî li ser şûrê xwe û awirek avêtiye şêr; şêr ji tırsan rîtiye xwe de. Piştî wê rojê ji Êzdîn re Êzdînşer an jî Şêrêzdîn hatiye gotin.”

Îşareteke ku ihtimala versiyona kilamê ya di dema serfermandariya wî ku piştî mîrîtiyê guherîbe, piştrast dike dîsa di versiyoneke kilamê ya li herêma Botan veşartî ye. Di hin versiyonê herêma Botan de “Êzdînşêr begê Botanê” tê gotin. Di mîrektiya Botan de mîrêni ji xanedanê (çi mîr be ci mîr nebe) bi peyva begê hatine xîtabkirin û ev jî hem di çavkaniyan de hem jî di çîrokên nava gel de tê dîtin. Di serdema fermandariya leşkerî de jê re beg hatibe gotin ihtimal heye ji vê sebebê be. Îcar mirov dikare bibêje piştî ew dibe mîr ev riste ji bo mîrîtiya wî bê nişandan bi awayê “Êzdînşêr mîrê Botan e” hatiye guhertin.

Baneşana “mîr hawar e” jî li gora şiroveyên vê sernivîsê dibe ku di wateya “mîr diqîre, gazî dike” de hatibe bikaranîn. Xelef jî li gora van şiroveyan dijwateya selefê ye û tê wateya paşhatî. Yanê ev peyv (xelef) ji pêşeng, mîr û fermandarêni ji malbata xanedanî ya wê serdemê re tê gotin. Êzdînşêr ku ji xwe re “xelef” dibêje (yan jî ku Êzdînşêr re xelef hatiye gotin) ji ber ew kurê Mîr Sêvdîn û nesla malbata xanedanî bûye, peyda bûye.

Di versiyona kilamê ya *Dîroka Kelepora Mîrnişîniya Botan* (Bafi, 2005) de ristikêن “Gel eşîra bi hêvî me” û “Gel eşîra bi xwende me”²⁰ jî, işaret dikin ku mîr, rîber an jî fermandar ji bo şer û serhildanê ji eşîran hêviyeke erênî dike; herwiha mirov dikare bibêje ku eşîr ji bo tevlibûna şer û serhildanê têni motîvekirin. Dîsa di heman pirtûkê de ristikêni bi awayê “*Bomba bavêñ Gemrexê; meşin herin ser Şernexê*” di wesfê gazîkirina şer de ne.

Wek encama nîrxandinêni di bin vê sernivîsa pirsî de; ev kilam di sedsala 19mîn de li Kurdistanê di şer û serhildanan de ji bo tîrsandina dijmin, zîndekirin û cesaretkirina ruhê leşkerî û piştî serkeftinê ji bo pîrozbahiyê (mîna marşa mehteranê ya Osmaniyan) kilameke marşkî bûye û ihtimal heye ku di her serdemê de li gora bûyer û kesan ji nû ve hatibe şirovekirin.²¹ Dema em werin ser sebebê ku ev kilam zêdetir bi navê Êzdînşêr û Mîrektiya Botan hatiye nasîn û gotin; hebûna navê

20 Li gorî me di pirtûkê de ev riste şaş hatiye nîvîsin. “bi xwende me” bê wate ye û li kilamê jî nayê, divê rastiya ristikê wekî “Gel eşîra bixwe bendî me” be.

21 Li vir hin taybetiyêni din jî hene ku divê li ser bê sekinîn: Di hin ristikêni kilamê yên bi awayê “Êzdînşêr mîre/begê Botan e/Botanê” de tê behskirin ka mîr kî ye an jî dema xîtabî mîr tê kirin ristikêni din li gora kesê yekem hatiye kêşan. Li gorî vê (ji ber bi piranî li gorî kesî yekem hatiye kêşan) kilam li ser navê serhildan û rîberê wê dihat gotin û dibe bê gotin ku di ristikêni li gorî kesê sîyem hatine kêşan de jî (kesê kilam li ser navê wî tê gotin) ew kes behsa xwe dike. Yan jî di rastiya xwe de dîsa li gorî kesê yekem hatiye kêşan û “Êzdînşêr im mîrê/begê Botan im” bi guherîna dengan re ihtimal heye bûbe awayê kesê sîyem. An jî em dikarin bibêjin di zimanê kilaman de hin qertaf li gorî qafiyeyê dibe bêni bikaranîn.

Mîrektiya Botan di versiyonê kilamê yên gehîştine îro de, ji ber şer û serhildanê Kurdan ên sedsala 19mîn ku belavê piraniya Kurdistanê bûne, dibe ku zêdetir ji navenda Botan bûne²² û serek û fermandarên wan jî ji mîrên Botan bûne. Yanê kilam piştî ku serhildanê Kurdan ên nîveka duyem a sedsala 19mîn qewimîne, li vê serdemê hatiye adaptekirin û navdar bûye yan jî cara pêşî di vê serdemê de derketiye. Sebebê borîna navê Îzdinşêr di gelek versiyonê kilamê de û wisa jî hatina wê heta roja me, bi ihtîmaleke mezin ew e ku Îzdînşêr mîrê dawî bû û serhildana wî gelekî girîng bû.

Piştî me bi vî awayî yek ji wateyên ihtimalî anî ziman, di bin pirseke sernivîsî de em ê derbasî wateyeke din a ihtimalî bin.

Dibe ku ev kilam derbarê Şêx Ubeydulahê Nehrî de be?

Ji bo ev pirs bi referansên erêni were berfirehkîrin, divê Şêx Ubeydulahê Nehrî, rûmeta wî ya di nava Kurdan de û girîngiya serhildana ku wî da destpêkirin bêz zanîn. Di dawiya sedsala 19mîn de dema veguherîna dewletên Osmanî û Îranê ya nîv-mêtîngîriyê qedîya, rewşa Kurdan a aborî û siyasî jî bi lez lawaz bû. Tevgerên gelî, pevçûnê çekî û êrîş, bûbûn bûyerên jirêzê; desthilatiya rêveberên herêmî yên ji aliyê Osmaniyan ve hatibûn tayînkîrin ketibû asteke bi qasî tunebûnê. Bêdesthilatî û aloziyê ji bo ku tevgera rizgariya Kurdistanê ji nû ve xwe gur bike, derfetên bikeys amade dikir (Lazarev û Mihoyan, 2013: 149-150). Piştî şerê rojhilatê ku bi serhildana Îzdînşêr dijwartir bû bi bist salan jî hikûmeta Osmaniyan di vê pêvajoyê de ji bo desthilatiya xwe qewî bike li quncik û deverên talde yên Kurdistanê jî tedbîrên gelek hişk û dijwar digirtin. Şêx û serekên eşîrên Botan û Hekariyê ji bo serxwebûna xwe ya berê careke din bi dest bixin li benda demeke musâid bûn (Averyanov, 2010: 139, 140). Di salên 70yî yên sedsala 19mîn de ji nû ve gurbûna “pirsgirêka rojhilatê” û nêzikbûna şerê Rûsan û Osmaniyan bûn sebebê nexweşiyê li ser rewşa sînorê Îran-Osmanî yên ku Kurdistan parce kiribûn. Di destpêka sala 1877an de li du eniyan (Balkan û Qafqasyayê) şerê di navbera Rûsan û Osmaniyan de (herba 93an) dest pê kir. Çawa şerê 1877-78an di navbera Osmanî û Rûsan ku li Asyaya Biçûk bûbû sebebê windakirina erdan qedîya, Osmaniyan ji bo Kurdên serhildêr bidewisîne, ji nû ve dest avêtin çekan. (Averyanov, 2010: 185-186; Bruinessen, 2005: 278-279; Lazarev û Mihoyan, 2013: 146-148).

²² Cizîr navenda Mîrektiya Botan bû ku yek ji mîrektiyê kevintirîn ên Kurdistanê bû; ji ber li ser riyêni ji Anadolê têni û diçin Îraq û rojhilatê Sûriyeyê bû, bi boneya rewşa xwe ya erdnîgarî di dîroka Kurdan a siyasî, aborî û çandî de roleke girîng lîstiye (Lazarev û Mihoyan, 2013: 115).

Dema şerê Rûsan û Osmaniyan dewam dikir, Osmaniyan (Sultan Abdulhamidê Duyem) di vê serdemê de bi niyeta ku dê bandorê lê bike li ser navê pêxember li dij Rûsan şerê pîroz (cîhad) ïlan kiribû. Ji ber ku Kurdan bi guman li xelîfetiya padîşahên Osmanî dinêrîn, gaziya cîhadê ya padîşah di nava Kurdan de zêde biwate nebû. Li ser vê Osmaniyan serî li alîkariya rîberên dînî dan ku Kurd hemû hurmetkar û girêdayîyê wan bûn. Şêx Ubeydulahê ji Kurdêن Hekariyê, serekê eşîra Oremara biçûk, ji neseba Xalid bin Welîd, niştecihê Şemzînanê û sofiyê Neqşibendî yê 50 salî, şexsiyetekî (1830-1883) ewqas bijare bû ku ji aliyê piraniya Kurdan ve wek rîberê dînî dihat nasîn. Piraniya Kurdan ew wekî “kesekî pîroz” û warisê rewa yê xelîfeyan didit. Şêx Ubeydulahê li tevahiya Kurdistanê di asta ewliyatîyê de dihat dîtin, bû yek ji kesên bersivdar ji bo gaziya cîhadê ya padîşah. Şêx Ubeydulah bi yekîneyeke ji murîdên xwe ji Hekariyê ber bi eniyê ve çû. Hin beg û şêxên bakûr-rojavayê Kurdistanê jî destek dan Şêx Ubeydulah. Lê Şêx Ubeydulah û Kurdêن tevî cîhadê bûn ruhekî şerker nedan nîşan. Şêx Ubeydulah tevî tu hereketên leşkerî nebû, tenê ji bo pêş de li dij serweriya osmaniyan bikar bîne, kete nava hewldaneke mezin ku bandora xwe li ser eşîrên Kurdistana Osmanî û Îranê zêde bike û erdên derdora sînor jî firehtir bike. Hin rîberên din ên Kurd ku tevî cîhadê bûbûn jî helwesteke wiha nîşan dan. Plana dawî ya serhildana Şêx Ubeydulah di civîna ku di dîrokê de yekem bû, ji aliyê rîberên Kurdan ve hat amadekirin. Ev komcivîn di hezîrana sala 1880yî de, di bin rîbertiya Şêx Ubeydulah de di hevdîtinê Nehriyê de kom bûbû. Di civîna Şemzînanê ya tebaxa 1880yî de şêx û şexsiyetên din ên dînî ku bi gaziya Şêx Ubeydulah ji çar aliyên Kurdistanê hatibûn, di nava hemû eşîrên Kurdan de tifaqeke giştî pêk hatibû; yanê biryarêñ giştî yên ku yekîtiya Kurdan saz bike hatibûn tesbîtkirin. Di hevdîtina Nehriyê de Şêx Ubeydulah dibêje ku desthilatiya Osmaniyan a li ser alema Îslamê ne rewa ye, xelîfeyêñ Osmanî ne ji nesla pêxember in û ji ber van sebeban li gora şerîtetê ew ne dikarin bibin padîşah ne jî xelîfe. Li aliyekî din wî gotiye ku dewleta Osmanî lawaz dibe û ber bi hilweşînê ye û divê Kurd ji desthilatiya Osmanî û Îranê xelas bibin; loma ev her du dewlet jî pêşveçûna Kurdan asteng dikin. Şêx Ubeydulahê neteweperwer bawer dikir ku yekane riya ku Kurdan ji wê rewşa bêbext xelas bike, bi yekbûna parçeyêñ Îran û Tirkîyê re avakirina Kurdistanêke serbixwe ye. Şêx Ubeydulah ïlan kir ku armanca bingehîn a serhildanê avakirina Kurdistanêke serbixwe ye. Operasyona ku şêx plan kiribû, bi kiryarî di meha tebaxa sala 1880yî de dest pê kir. (Lazarev û Mihoyan, 2013: 146-154; Averyanov, 2010: 143-189, Kutschera, 2013: 28-29; Bruinessen, 2006: 278-279)²³.

23 “Şêx Ubeydulla ji diplomatên îngilîzan re gotiye ku Kurd “neteweke cuda” ne û ew bi xwe jî hewl didin ku Kurdêن Osmanî û yên Îranî bigihînin hev. (Bozarslan, 2005:

Piraniya Kurdan bawer kirine ku binyada padışahê osmanî nagehiye Pêxember û ji ber vê jî ne xelîfeyên rastî ne; dibe ku ev wekî işaretekê bê qebûlkirin ji bo ku fikirîne rêberên wan ên dînî digihîjin pêxember û rêberê wan xelîfe ye.

Konsolosê Erziromê yê kevn ku di dawî de bûye konsolosê Helebê Musteşar Îvanov, di notên xwe yên derbarê Kurdên Botan de wiha gotiye:

“...Tevahiya Kurdistanê idîa dike ku tu carî padışahê Osmaniyan nas nekirine û girêdayê wî nebûne... Kurdên Êzîdî tu demê nebûne Misilman; Kurdên Dêrsimê jî Elewî ne. Ji ber vê jî ne di fikra Êzîdiyan ne jî ya Elewiyan de, baweriyeke ku sultanê Osmaniyan xelîfeyê Muhemed Pêxember e tuneye û ji ber vê jî ji xelîfetiya Osmaniyan tu berpirsyariyekê li ser xwe nabînin. Lê Kurdên Botan xelîfetî û İslâmê wekî hev dibînin, lê idîa dikin ku mafê rewa yên xelîfetiyê heqê xanedana Ebasiyan e, ne ku yê Osmaniyan” (Notên derbarê Kurdên Botan yên konsolosê Erziromê yê kevn ku dawiyê bû konsolosê Helebê Musteşar Îvanov, 1877-78, nql: Averyanov, 2010: 341-347).

“Dema mîrektiyên Kurdan ji holê hatin rakirin li herêmê cihê malmezinên mîr û began malmezinên Neqşibendiyan girt. Yanê malmezinên nû derketin. Şêxên Neqşibendî ev xanedan pêk anîn. Van hêza siyâsi jî bi dest xistin. Kurê Seyîd Tahayê Nehrî Şêx Ubeydulah ji malbateke girîng bû ku malbat hem ji alîman hem jî ji nesla Evdilqadirê Geylanî dihat. Seyîd Taha xelîfeyê Mewlana Xalid ê herî girîng bû di Kurdistanê de. Piştî ku Seyîd Taha li gundê Nehriyê (îro navê Tirkî Baglar e) yê li ser Şemzînana Colemêrgê bi cih dibe, li wir xelîfetiyeke mezin a Neqşî ava dibe. Hêza şêxîtiyê ku ji terîqetê dihat a Seyîd Taha û kurê wî Şêx Ubeydulah herêma Kurdan a li Îranê jî di xwe de digirt.” (Hepveyvîn: Yüksel, 2009).

Di bin nirxandin û jêgirtinên heta niha de kilama *Ez Xelef im* dibe bê gotin ku derbarê Şêx Ubeydulah de ye û ev rewş bi du îhtimalan dikare bê şirovekirin. Yekem; Ev kilam dibe ku ji aliyê Şêx Ubeydulah ve hatibe gotin, da ku zêdekirina tevlibûna Kurdan di serhildanê de pêk were, wan motîve bike, cesaretê bide wan û hem jî behsa xwe (hêz, girîngî û navê xwe) bike. Di vê rewşê de Şêx Ubeydulah ji bo bandorê li kesên derdora xwe bike gotiye *ez xelef im* (xelîfe me) û bi vî awayî daye xuyakirin ku nesla wî digihîje Pêxember Muhemed.

202).” Lîbelê tevgera di bin rîbertiya Ubeydulah de ji ber kîmasiyêni siyâsi, leşkerî û rîexistinî têk çû. Di vê de helwesta Rûsistan, Îngilistan û Osmaniyan jî bi bandor bûye. Di gel her tiştî serhildana Kurdan a 1880yan xwedîyê wateya dîrokî ye. Ev, di dîroka tevgera rizgariya Kurdi ya cudaxwazî de û ji bo tevgera rizgariya Kurdi taybetiyeke giştî û Kurdi qezenc bike ne serkeftî bû; lê gaveke cidî bû. Ev tevger, hem ji aliyê siyâsi, hem ji aliyê rîexistimî ve ji hereketên Kurdi yên pêşıya xwe astek jortir bû (Lazarev û Mihoyan, 2013: 152-154).

Îhtimala duyem jî bi vî awayî ye; Şêx Ubeydulah xwestiye tevlibûna Kurdan bi hestên xwe yên dînî bo şerê cîhadî yê Osmaniyan ku li dijî Rûsan ûlan kiribûn (bi vê ji têkoşîna rizgariya Kurdî dûr bikevin) asteng bike; ji bo Kurdan bike nava serhildaneke mezin gotiye padîşahê Osmaniyan ne xelîfe ye û bi behskirina hêz û navê xwe xelîfetiya xwe bi xwe ûlan kiriye. Bandor û rîbertiya dînî, hatina wî ya ji nesla pêxember an jî ku wisa tê dîtin a Şêx Ubeydullah bûye sebeb di nava Kurdan de wekî warisê xelîfe yê yasayı bê qebûlkirin; ev jî îhtimala ku wî xelîfetiya xwe ûlan kiriye zêdetir dike. Di vê rewşê de *Ez Xelef im* di kilamê de tê wateya “Ez Xelife me”²⁴ Mirov dikare li ser îhtimala îlankirina xelîfetiyê, şîroveya ku ev kilam ji bo serhildanê wê demê bûye strana wêrekî, coş û serkeftinê jî, lê zêde bike. Di vê mijarê de ji bo her du îhtimalan jî pirsek tê hişê mirov: Heke kilam di derbarê Şêx Ubeydulah de be, wê demê wateya “Êzdînşêr mîrê Botan e”çı ye? Yanê çîma navê Êzdînşêr di kilamê de dibore? Dibe ku sebebê derbasbûna navê Êzdînşêr di kilamê de ew be ku (her çiqas dîl jî be) Êzdînşêr heta wê demê wekî mîrê Kurdistanê dihat dîtin. Yanê Ubeydullah dixwaze bibêje “Ez xelîfe me” û “Êzdînşêr jî mîr e”. Ristika “hawar e mîr” jî dibe ku ji bo îhtimala gaziya xelaskirina Êzdînşêrê dîlgirtî be. Yan jî dibe ku di rastiya xwe de Şêx Ubeydullah gotiye “min hawar e” û ev ristik guheriye bûye “mîr hawar e”.

Di vê rewşê de kilama *Ez Xelef im* a ku bi Şêx Ubeydullah dest pê kiriye, di serdemêney pey wî de di folklorâ Kurdî de cihekî girîng girtiye; ev jî dibe ku ji têkiliya kesekî wekî Şêx Ubeydulahê rîbereki dînî û siyasi û danerê serhildaneke mezin û berfireh e li Kurdistanê. Sebebê ku têkiliya kilamê (di şîroveyîn îroyîn de) bi Şêx Ubeydulah re nehatiye danîn jî, wiha dikare bê şîrovekirin ku di kilamê de navê wî qet nabore û kilam heta ku hatiye iro derveyê wateya xwe ya rastîn hatiye bikaranîn.

4. ENCAM

Folklor xwedîyê taybetiyeke wisan e ku ji serdema dizê û geşedanê dike şopêñ civakî, çandî û siyasi, carinan yekser û carinan jî neyekeser nîşan dide. Kilama *Ez Xelef im* jî di folklorâ Kurdî de derbarê serdema jê derketiye û navdar bûye de (sedsala 19mîn) şopêñ dîroka Kurdî yekser di xwe de digire û wekî mînakeke çanda Kurdî ya devkî xwedîyê cihekî girîng e. Kilam van şopan yekser di xwe de negire jî, bi wateyêñ îhtimalî yên ji wateyekê zêdetir, di dîroka Kurdî de derbarê mijarêñ curbicur ên wekî şexsêñ girîng, bûyer û qewimînan de, hebûna taybetiyêñ cuda piştrast dike, an jî mirov digihîjîne daneyêñ dîrokî yên ku heta iro li ser nehatine sekinîn.

24 Dibe ku “Ez Xelife me” bi demê re guherînêñ dengan pêk hatibe û bûbe “Ez Xelef im”

Di beşeke mezin a çavkaniyêن dîroka Kurdî yên nivîskî de, dîroka Kurdî ya sed-sala 19mîn serdemâ derketina neteweperweriya Kurdî, destpêka tevgera netewetiya Kurdî û dema jiyanekê pir livîn a xelekek şer, serhildan, berxwedan û têkoşîna rizgariyê ye. Kilama *Ez Xelef im* di çarçoveya vê xebatê de, digel gelek wateyêن iştimalî ku li ser hat sekinîn, işaretî xaleke hevpar a van hemû iştimalan dike: Ev kilama ku di hafizeya Kurdî ya devkî de xwediyyê wateyeke destanî ye, dikare bê gotin ku şewqdana vê livdariya dîroka sedsala 19mîn a di folklorê de ye. Yanê ci berî Ezdînşer ci jî di serdemâ wî de derketibe, an jî derneketibe û armanca kilamê ci dibe bila bibe, dikare bê gotin ev kilam di serhildan û têkoşîna rizgariya Kurdî de xwediyyê taybetiya marşeka serkeftin, qehremanî, wêrekî û berxwedanê ye; an jî bi demê re ev taybetî girtine nava xwe. Di hafizeya devkî ya Kurdî de ji ber ku îro jî kilam xwediyyê vê wateyê ye, ev iştimal piştrast dibe. Li aliyekî din, girîngiya kilamê ya ku ji berê ve heta îro di nava Kurdan de hebûye jî, divê ji ber dîrok û wateyeke wiha ya kilamê be.

5. ÇAVKANÎ

- Averyanov, P.İ. (2010). *Osmanlı İran Rus Savaşlarında Kürtler (19. Yüzyıl)*. Çev: İbrahim Kale. İstanbul: Avesta Yayıncıları.
- Bozarslan, H. (2005). Türkiye'de Kürt Milliyetçiliği Zimni Sözleşmeden İsyana (1919-1925). Vali, A. (Ed.), *Kürt Milliyetçiliğinin Kökenleri* (199-229). İstanbul: Avesta.
- Bruinessen, M.V. (2006). *Ağa, Şeyh, Devlet* (4. Baskı), Çev: Banu Yalkut. İstanbul: İletişim Yayıncıları.
- Celil, C. (1992). *19. Yüzyıl Osmanlı İmparatorluğu'nda Kürtler*. Çev: Mehmet Demir. Ankara: Öz-Ge Yayıncıları.
- Cigerxwîn. (1988). *Folklorla Kurdî*. Stockholm/Sweden: Weşanên Roja Nû.
- Çelebi, N., Yıldırım, V., Ataş, A.G. (2006). "Geleneksel Kürt Müziğine Genel Bir Bakış", BGST. (<http://bgst.org/kurtce-muzik/geleneksel-kurt-muzigine-genel-bir-bakis->).
- Hassanpour, A. (2005). *Kürdistan'da Milliyetçilik ve Dil (1918-1985)*. Çev: İbrahim Bingöl, Cemil Bindoğan. İstanbul: Avesta Yayıncıları.
- Jwaideh, W. (2014). *Kürt Milliyetçiliğinin Tarihi Kökenleri ve Gelişimi* (8. Baskı). Çev: İsmail Çekem-Alper Duman. İstanbul: İletişim Yayıncıları.
- Kardam, A. (2011). *Cizre-Bohtan Beyi Bedirhan Direniş ve İsyancı Yılları* (2. Baskı). Ankara: Dipnot Yayıncıları.
- Kardam, A. (2013). *Cizre-Bohtan Beyi Bedirhan Sürgün Yılları*. Ankara: Dipnot Yayıncıları.
- Kutschera, C. (2013). *Kürt Ulusal Hareketi* (2. Baskı). Çev: Fikret Başkaya. İstanbul: Avesta Yayıncıları.
- Lazarev, M.S., Mihoyan, Ş.X. (2013). *Kürdistan Tarihi* (4.Baskı). Çev: İbrahim Kale. İstanbul: Avesta Yayıncıları.
- Mele Xelefî Baftî. (2005). *Dîroka Kelepora Mîrnîşîniya Botan*, (Veguhestina Tipan: Dilawerê Zengî, Derhêner û Kombiyûter: Royar Zengî). Beyrûd- Libnan: Çapxaneye Emîral.
- Nora, P. (1989). "Between Memory and History: Les Lieux de Mémoire," *Representations* 26, Special

- Issue: Memory and Counter Memory, Spring, pp. 7-24.
- Şerefhan, (1990). *Şerefname*. Çev: M. Emin Bozarslan. İstanbul: Hasat Yayınları.
- Öğün, T. (2010). *Doğu'nun Mirlerine Son Veda: Cizreli İzzeddin Şir Bey ve İsyani*. İstanbul: Yeditepe Yayınevi.
- Yüksel, M. (2009). "Kürtlerdeki Ulusalçı Damar" ya ku hevpeyvîn kiriye: Aynur Aydoğan, Dünya Bülteni (12.09.2009).

Extended Abstract

Kurdish oral cultur sepecially Kurdish traditional music has a great of importance as being a source of Kurdish history. In this sense, although there isn't any certain information about its meaning *Ez Xelef im* song as being one of the popular represantive of Kurdish folk song is a verbal sourche to clear and examine the nineteenth century which the most important developments of Kurdish history occured.

Nineteenth century which is handled by most of the writing history sources about Kurdish history as the birth of Kurdish nationalism and beginning of Kurdish national movement is a rather moving period for the Kurdish history. It can be said that *Ez Xelef im* song which has a epic meaning in Kurdish verbal memory is a reflection of that moving period of nineteenth century Kurdish history. Because this song almost has a rhythm and content that reflect the wars, political and politics development in Kurdistan during nineteenth century. These developments mainly include a number of uprisng, resitance and liberation struggle. Therefore there is a very strong possibility to say that this song was as a resistance and victory march for Kurdish people which motive them to war during this moving period

From another angle this song also has a lot of hints which provide thinking about developments never handled by written history of Kurdistan and provide evaluating some events and persons which registered to written history by a non-objective way with a new perspective. The most important historical figuras of nineteenth century of Kurdish history which we can rethink about by this song are Şêx Ubeydullah and Êzdişêr (Yezdanşêr). Although he is a hero figure in Kurdish local memory and verbal cultur Êzdişêr is entitled by the writing history as a traitor. And writing history has a very limited information about Êzdişêr. Şêx Ubeydullah is one of most important figure of nineteenth century Kurdish history and he is the leader of the last and most important Kurdish uprising which occur in that century. But alike Êzdişêr writing history has a limited information about it, too. When analized *Ez Xelef im* as a verbal source it can offer new informations and viewpoints about these two historical figure. This case shows as that verbal history and verbal cultur can be both a source or contemporary of writing history and a critic of writing history. Specially publics like Kurdish whose writing history registered late and mostly with non-objective needs verbal sources more.

This article's aim is to analyze a traditional folk music via a period of Kurdish history and present new informations and viewpoints about some events and historical figures of Kurdish history. And finally emphaize the importance of Kurdish verbal cultur as being a source of history. According this purpose it was benefited both writing and verbal informations and personal observations for analyzing *Ez Xelef im* folk song.